

Qalam

Safar 1388 Mei 1968
Bilangan 211 60 sen.

Sedarlah

Dalam masa yang akhir-akhir ini, terutamanya menjelang masa pilihan raya tahun 1969, parti pemerintah dan parti lawan masing-masing bersiap-siap untuk berusaha menarik perhatian rakyat kepada parti mereka dengan berbagai-bagai cara dan keadaan. Yang nampak hebat di dalam pertentangan ini ialah di antara parti Perikatan dengan parti PAS, di dalam mana banyak pula terjadi pilihan raya kecil berlaku disebabkan oleh kematian anggota-anggota perwakilan itu di dalam *Parliment* yang mesti diganti. Bolehlah dikatakan daripada pertentangan itu bolehlah dipandang sebagai suatu riak yang menarik yang patut dikaji dan diperhatikan dengan dengan¹ saksama.

Di daerah yang bertentang dengan hebat itu dua tahun terjadi pula wabak banjir yang besar dan pada tahun ini terjadi pula kemarau yang panjang. Dengannya tentunya rakyat di tempat-tempat itu menderita penuh dengan penderitaan-penderitaan yang hebat yang menghendaki supaya mereka bersatu, bekerjasama – Tegasnya, mereka sangat berhajat disatukan untuk bekerjasama menghadapi keadaan yang sulit dan payah dalam mengatasi penderitaan yang hebat itu.

Tetapi di sebalik malang yang datang itu, pengaruh-pengaruh parti politik yang diketengahkan kepada mereka yang sedang menderita itu bukannya timbul mendatangkan perpaduan tetapi sebaliknya. Kedatangan ahli-ahli politik dari kedua-dua parti itu tidak mencari jalan islah untuk menghadapi perkara-perkara yang menyelamatkan mereka supaya berkekalan di dalam persaudaraan bahkan kedatangan mereka menjauhkan lagi jurang yang renggang dan memisahkan mereka di antara satu sama lain sehingga timbulah perasaan bermusuh-bermusuhan sesama mereka, sesama orang-orang Melayu, sesama Islam, sesama serumpun dan seketurunan kerana hasutan-hasutan dan pertentangan-pertentangan siyarah.

Dengan tidak disedari mereka hancur – Rasa ukhuwwah Islāmiyyah mereka tidak ada; semangat benci membenci bersemarak, semangat bermusuh-musuhan semakin menjadi-jadi dan akhirnya orang yang sebangsa, seagama, serumpun, sesaudara dan sedarah sedaging menjadi musuh-musuh yang ketat dan dahsyat.

Kalau persaudaraan umat sudah tidak ada lagi – Orang yang bersaudara telah berpecah belah, maka runtuhan bangsa itu akan diperkotak katikkan oleh orang lain. Hancurlah bangsa itu dan bangsa itu akan tinggal namanya sahaja.

Siapakah yang bakal disalahkan di dalam persoalan ini? Kita tidak mahu menempelak tetapi yang sepatutnya hendaklah pemimpin-pemimpin yang sedar dan insaf akan bahayanya perpecahan ini, bukannya sahaja perpecahan di dalam

kehidupan sehari-hari, tetapi juga di dalam persatuan beragama. Hendaknya ada sesuatu golongan yang maju ke tengah menyedarkan rakyat supaya jangan diperlakukan dan dijadikan perkakas untuk memecahkan persatuan untuk menghancurkan bangsa dan agama sendiri.

Kesedaran yang demikian ini sepatutnya hendaklah dibangkitkan sekarang untuk mengatasi persoalan yang berbahaya yang dicari-cari oleh lain-lain golongan untuk meruntuhkan kedaulatan orang-orang Melayu yang perjuangannya sudah pun dicap oleh mereka perkauman sekalipun perjuangan itu hak mutlak mereka.

* * *

Lawatan Haile Selassie dibantah

Maharaja Haile Selassie yang dijadualkan akan berangkat tiba di ibu kota pada bulan Mei ini adalah suatu lawatan yang tidak digemari dan dibantah oleh badan-badan Islam di sini. Bantahan ini mulanya disuarakan oleh al-Rahmaniah (Badan Dakwah dan Kebajikan Islam Malaysia) yang kemudiannya diikuti oleh badan-badan Islam yang lain.

PAS, sebagai sebuah badan siyarah Islam, di dalam mesyuarat agungnya di Perlis pada bulan April yang lalu juga membantah keras atas lawatan itu dan menuntut kerajaan supaya tidak mengizinkan lawatan Haile Selassie itu sebagai suatu simpati terhadap kepada langkahnya terhadap apa yang dikatakan penindasan kerajaannya terhadap saudara-saudara mereka orang-orang Islam di Ethiopia.

Al-Rahmaniah, di dalam satu surat siarannya kepada umum memberikan kenyataan-kenyataan

¹ Perkataan ‘dengan’ diulang dua kali dalam teks jawi.